



REPUBLIKA E SHQIPËRISË

**AUTORITETI I KONKURENCËS
KOMISIONI I KONKURENCËS**

VENDIM

Nr. 638, Datë 18.07.2019

“Për dhënien e disa rekomandimeve për ofrimin e shërbimit të ndryshimit të pronësisë së mjeteve motorike”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 18.07.2019 ,shqyrtoi çështjen me:

- Objekti:** Për dhënien e disa rekomandimeve për ofrimin e shërbimit të ndryshimit të pronësisë së mjeteve motorike;
- Baza Ligjore:** Neni 24, shkronja (d), (f) dhe nenin 69 dhe 70 i Ligjit Nr. 9121, datë 28.07.2003 “Për Mbrojtjen e Konkurrencës”,

Komisioni i Konkurrencës, pas shqyrtimit të:

- Relacionit të Sekretarit të Përgjithshëm të Autoritetit të Konkurrencës;

VËREN SE :

1. Dhoma e Noterëve Tiranë, i është drejtuar Autoritetit të Konkurrencës, me shkresën Nr .193 Prot të AK-së., datë 08.03.2019 “Kërkesë për ndërhyrje dhe vënie në dijeni”, në lidhje me një njoftim, sipas të cilit në zyrat dhe sportelet e Drejtorisë së Përgjithshme të Shërbimeve të Transportit Rrugor (DPSHTRR), prej datës 1 Mars 2019, ofrohet shërbimi i ndryshimit të pronësisë së mjeteve motorike, i cili deri në këtë moment ofrohej nga zyrat e noterëve nëpër qytetet e Shqipërisë.
2. Autoriteti i Konkurrencës me shkresën Nr 193/2 Prot., datë 15.03.2019 “Kërkim informacioni” i është drejtuar DPSHTRR duke i kërkuar vënien në dispozicion të të gjithë praktikës dhe informacionit që disponohet prej tyre, bazën ligjore përkatëse mbi të cilën është vendosur ofrimi i shërbimit të ndryshimit të pronësisë së mjeteve

motorike nga ky institucion si dhe metodologjinë apo përlogaritjet mbi bazën e të cilave është përcaktuar tarifa e ofrimit të këtij shërbimi.

3. DPSHTRR me shkresën Nr 193/3 Prot., i AK, datë 04.04.2019 “Kthim Përgjigje”, argumenton se ka të gjithë infrastrukturën e nevojshme për shtirjen dhe ofrimin e shërbimit në mbarë territorin e vendit duke pasur edhe burimet njerëzore me staf profesional të dedikuar për kryerjen e këtij shërbimi me korrektësi, siguri juridike dhe efikasitet.
4. DPSHTRR, bazuar në VKM Nr.343, datë 21.07.1999 “Për krijimin e Drejtorisë së Përgjithshme të Shërbimeve të Transporti Rrugor”, ka statusin e personit juridik publik, me vetëfinancim dhe me objekt të veprimtarisë shërbimin ndaj subjekteve fizik dhe juridike, shtetërore dhe private, në veprimtarinë e transportit rrugor, si dhe çdo objekt tjetër veprimtarie të lejuar nga ligji dhe aktet nënligjore në fuqi.
5. Synimet e kësaj nisme sipas DPSHTRR kanë qenë ulja e informalitetit, sensibilizimi dhe finalizimi në një sportel të të gjithë procedurës për ndryshimin e pronësisë së mjetit; ulja e barrës financiare ndaj qytetarëve për marrjen e këtij shërbimi, pasi në kuadër të reformës së de-rregullimit, DPSHTRR siguron vetë nëpërmjet sistemit informatik gjithë të dhënat korrekte për dokumentacionin e mjetit, debitë ndaj tij si vërtetim për taksa, etj, konfirmime në Interpol, konfirmim nga RBS, etj.
6. Këshilli Drejtues i DPSHTRR me Vendimin Nr. 10, datë 23.05.2018 “Për Miratimin e Tarifës së Shërbimit për Ndryshimin e Pronësisë së Mjetit”, ka vendosur miratimin e tarifës së shërbimit të ndryshimit të pronësisë së mjetit në vlerën 1200 lekë. Ky vendim është miratuar nga Ministria e Infrastrukturës dhe Energjisë, me shkresën nr. 74/1, datë 01.02.2019, “Për miratimin e tarifës së shërbimit për ndryshimin e pronësisë së mjetit”.
7. Kjo tarifë është më e ulët krahasuar me tarifën që ofron shërbimi i noterisë sepse sipas DPSHTRR:
 - Të dhënat e shitësit dhe blerësit merren automatikisht nëpërmjet sistemit informatik nga regjistri i gjendjes civile;
 - Të dhënat për mjetin merren automatikisht nga sistemi informatik *edpshtrr*;
 - Koha e shkurtër e punës së punonjësit të specializuar që merret me hartimin e kontratës së ndryshimit të pronësisë së mjetit.
8. Konstatohet se ky shërbim, i cili më parë kryhej nëpërmjet zyrave noteriale, tashmë ofrohet edhe nga një burim tjetër alternativ që janë zyrat dhe sportelet e DPSHTRR. Në njoftimin dhe procedurën e ndjekur nga DPSHTRR bazuar edhe në praktikën që vete kjo drejtori na ka vënë në dispozicion me shkresën Nr 193/1 Prot të AK, datë 04.04.2019 “Kthim përgjigje” dhe shkresën Nr 193/7 Prot të AK, datë 09.05.2019

“Kthim përgjigje”, nuk i është hequr e drejta e ofrimit të këtij shërbimi edhe zyrave noteriale. Qytetari dhe subjekti janë të lirë të zgjedhin midis shërbimit që ofron DPSHTRR apo shërbimit që ofron një zyrë noteriale.

9. Komisioni i Konkurrencës ka zhvilluar seanca dëgjimore në datën 9 maj 2019 me përfaqësues të DPSHTRR, të Dhomës së Noterëve Tiranë si dhe të Ministrisë së Infrastrukturës dhe Energjisë. Në përfundim të seancave dëgjimore me shkresën Nr 193/3 Prot të AK., datë 12.06.2019 “Kërkim informacioni” i është kërkuar informacion shtesë DPSHTRR.
10. Nga të dhënat e administruara nga DPSHTRR me shkresën Nr 193/9 Prot të AK, datë 03.07.2019 “Kthim Përgjigje” rezultoi se duke filluar nga 1 Mars 2019 deri në 19 Qershor 2019 janë kryer në total 22 118 procedura të ndërrimit të pronësisë ku 16 583 procedura janë kryer nëpërmjet kontratave noteriale dhe 5 535 procedura janë kryer me shërbimin e ndryshimit të pronësisë nga DPSHTRR.
11. Sipas informacioneve të depozituara nga DPSHTRR, 25% e qytetarëve për periudhën kohore duke filluar nga 1 Mars 2019 deri në 19 Qershor 2019, kanë marrë shërbimin e ndërrimit të pronësisë pranë sporteleve të DPSHTRR dhe pjesa tjetër janë paraqitur me kontratë noteriale shit-blerje.
12. Profesionin e noterit në Shqipëri rregullohet, organizohet dhe funksionon në bazë të ligjit 110/2018 “Për Noterinë”. Në nenin 74 të Ligjit 110/2008, përcaktohet se për kryerjen e akteve dhe veprimeve noteriale, paguhet tarifa përkatëse të përcaktuara me udhëzim të përbashkët të Ministrisë së Drejtësisë dhe Ministrisë së Financave, pasi të kenë marrë më parë mendimin e Dhomës Kombëtare të Noterisë.
13. Për kryerjen e shërbimit të ndryshimit të pronësisë së mjeteve motorike nga noterët zbatohen tarifatat e shërbimeve noteriale të përcaktuara me Urdhrin e Ministrisë së Drejtësisë Nr. 279, datë 14.06.2012 “Për Miratimin e tarifave të shërbimeve noteriale” i ndryshuar, i cili ka dalë në zbatim të Ligjit Nr. 7829, datë 01.06.1994 “Për Noterinë”, i ndryshuar, i cili është shfuqizuar.

PËR KËTO ARSYE:

Komisioni i Konkurrencës, bazuar në neni 24, shkronja (d) (f), nenin 69 dhe 70 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:





1. T’i rekomandojë Ministrisë së Drejtësisë:
 - a) Të rishikojë Urdhrin e Ministrisë së Drejtësisë Nr. 279, datë 14.06.2012 “Për Miratimin e tarifave të shërbimeve noteriale” i ndryshuar, në zbatim të Ligjit 110/2018 “Për Noterinë”, duke përcaktuar tarifa noteriale konkurruese, lidhur me ofrimin e shërbimit të ndryshimit të pronësisë së mjeteve motorike.

- b) Tarifat për shërbimet noteriale, të jenë të orientuara drejt kostos dhe të bazuara në një metodologji të përlogaritjes së tyre.
- c) Të dërgojë për mendim pranë Autoritetit të Konkurrencës projekt aktet nënligjore të cilat kanë të bëjnë me përcaktimet e tarifave apo vendosjen e kufizimeve të ndryshme, në zbatim të nenit 69 të Ligjit 9121/2003 “Për Mbrojtjen e Konkurrencës”, i ndryshuar.


2. Ngarkohet Sekretari i Përgjithshëm për njoftimin dhe ndjekjen e zbatimit të këtij vendimi.

Ky vendim hyn në fuqi menjëherë.

KOMISIONI I KONKURRENCËS

Eduard YPI	Leida MATJA	Adriana BERBERI	Helidon BUSHATI
			
Zy/Kryetar	Anëtar	Anëtar	Anëtar

Juliana LATIFI


Kryetar